

永南
集

十七
齋

水南集

一函
四册

编著：〔明〕陈霆

出版：文物出版社

北京五四大街29号

印刷：韩营大队装订厂

北京大兴县

发行：新华书店北京发行所

浙江图书馆藏版

一九八七年二月木板刷印

定价：四十四元

统一书号：17068·1545

吳興劉氏
嘉業堂刊

水南集序

苕溪之源發自天目德清其上游也山川聳秀瑰瑋卓
犖紆滌窪匯裒萃而爲屏障融結而爲人才越自南宋
沈麟士講學吳羌繼之以休文之博洽吳潛之經義由
此其選也緣是人文輩出代有述作蓋嵩高降神或此
其理歟邑治之東有水南先生焉總丱岐嶷釋褐司諫
旣蹶而甫陟遽謝而旋歸其宦情殆泊如也遂乃留心
著述前後刊摹播行多矣惟水南一集其子綏寧尹夢
徵謀鋟諸梓未果有姪翀者以懷慶別駕改經閩閩實
刻成之然尙未全也間日求文於蔡子白石予惟先生
前達二君老友也樂爲序之敘曰有天文有人文天地

之文章萃於光岳吾人之文章發於言辭其致一也典
謨三百篇尙矣屈宋而下浸及六朝唐宋其間操觚染
翰之士大率拂抑幽隱投閒置散者爲多何哉文之在
人必得天地之精江山之助林泉之逸趣然後發而爲
文詞泄而爲疏章暢而爲歌詠寫情寄懷點景寓興要
有獨得其眞而勘破化工之妙者此蓋神以凝思思以
宣志志以鼓氣氣以達辭辭以會題題以狀物胸次磊
落吞吐精華燦然煥然照耀簡篇無怪也使夫宦塵之
羈跡簿書之勞形則固將輟思停毫候迎判理之不暇
矣寧能吟詠竟日也耶先生年未強仕掛冠桑梓結廬
兩山之間屏絕人世紛華塵鞅手摩簡編銳情著述雖

祁寒盛暑不廢朝夕故其灑翰盈籤卷帙幾百用心亦
良苦矣昔人有言作文固難評文亦不易自文選出而
文有定格音韻作而詩有定律以今攷之文貴沖澹賦
尙典則詩宜蘊藉詞取灑脫騷雅之宜瞻麗歌調之宜
鏗鏘舍是其何取哉今先生水南一集眾體悉具且又
根極道腴發揮理窟優游清深溫和簡勁紀傳則織簾
之註疏押詠則休文之聲律前事之不忘後事之益信
也由今追昔倡和其有人哉先民有作百司承式是固
宜錄以垂不朽也已先生之奏議具國史履歷具邑乘
志況具家傳考摭具別籍籍各有名首各有序總若干
萬言今長往矣其遺響餘韻則尙在焉斯亦一邑之光

也古所謂鄉先生歿可祀於社此固其人非歟因詮次
其顛末標之簡端嘉靖甲子歲仲冬之吉賜進士第南
京工部右侍郎同邑白石山人蔡汝楠序

水南集目錄

一卷

騷類

二卷

五言古詩

三卷

七言古詩

四卷

五言律詩

附排律

五卷

七言律詩

六卷

五言絕句

七卷

七言絕句

八卷

雜詩

五言
四言
三言
五言
七言

六言

九卷

歌行

十卷

詞

十一卷

序

十二卷

記

十三卷

賦

十四卷

行狀
墓表

十五卷

文

十六卷

贊
跋
箴
疏

十七卷

十書簡

七文

十五卷絕句

八詩州

墓表

十四卷

九類

十三卷

十詩

十二卷

水南集目錄

水南集卷一
吳興叢書

明德清陳
霆聲伯著

騷類

封禺君

防風氏有國于湖今武康封禺山其所守也

合九州兮來同走玉帛兮雷風瞻羽儀兮何紆渺重江
兮溟濛揚參旗兮拊鼓沿長波兮導蛟舞心懔恍兮罔
惕委巨軀兮九晦若有人兮山之隅列雲旌兮駕風輿
令倜象兮從後戒文狸兮先驅稟靈符兮帝所司下土
兮福予美山藪兮無疾禾叢叢兮在野歲將成兮薦几
筵紛進拜兮舞連蜷靈來降兮有儀恍三丈兮堂前鳴
鉦兮吹蠡桂醕薰兮靈醉只羌顧懷兮欲留乃遺余兮

芳芷把芳芷兮莫晤聊紉佩兮自喜

楚殤

羽有廟郡城中號曰憤王或云初建于弁山後徙入城中事見南史

弁山兮英英憤氣薄兮雲蒸虎哮兮蟒呵儼威神兮遊
行遊行兮何止挺弓戈兮據公宇牛何爲兮解軛堂何
爲兮虛左爟芒雲兮起龍揚四海兮大風指鴻溝兮誓
予孰反顧兮江東鼎之洪兮力舉山可拔兮氣沮慘哀
歌兮四發涕橫潛兮如雨美戀睠兮難離心惻惻兮欲
摧命奈何兮佳人時不利兮逝騅樂莫樂兮楚之霸悲
莫悲兮垓之下延晷影兮太息莽愁陰兮蔽馬髮上指
兮怒填膺飲長劒兮血澌青化爲厲兮統山精終千古
兮恨不平望九里兮懷彭城往來其間兮驅風霆

龜亭侯

孔愉放龜餘不溪中龜左顧而逝後封餘不亭侯鑄印如龜狀愉悟而佩之

秋水兮澄溪澹蒼山兮夕暉停余楫兮桂舲解余佩兮
蓀裾懷佳人兮水蒞沐芳澤兮從女掇瑤華兮登席潔
溪毛兮在俎重堂兮燎香宛君來兮雲飄揚君夷猶兮
曷之介鄉亭兮吾邦霞裳兮霓裘煌星兮有輝左紐兮
龜章耀肘後兮昭神奇俯清茗兮樂佳羞水碧兮療飢
歲崢嶸兮向晚耿余中兮遐思簫鐘兮日沉飈輪兮忽
騰目青楓兮獨疑君不見兮愁凝愁凝兮柰何叫空山
兮不聞固離合兮有期羌永蠲兮蘭薰

峴山祠

祠在峴山之陽碧瀾湖之上浮碧亭之後以祀顏平原蘇東坡王梅溪三公皆

嘗守湖者也

重湖渺兮雲海山靡靡兮蒼靄夫君兮不留穆清風兮
其如在被葛藟兮訊古确山石兮修阻駒何爲兮崖陰
舟何爲兮水滸溪有芰兮澗有蘋簇羞俎兮紛前陳君
行兮廻翔目瞬瞬兮愁人蔓何知兮當階烏何愛兮循
屋野芳秀兮春嶺木葉落兮秋谷莽平原兮遐矚儼生
氣兮可掬雪霏兮坡下梅偃蹇兮溪曲川原兮曷終睠
將事兮肅恭桂堂兮靚深蘅檻濕兮青紅藹白雲兮裳
衣晃明月兮儀容浮山兮玉嵯冷秋顏兮江楓氣景兮
倏忽靈來兮其中靈之來兮若聞祥風颯兮襲塵廣其
乘兮下從紛總總兮玄雲采芙蓉兮芳洲擷蘭若兮清
渚望遠道兮莫寄歲冉冉兮其已君不可兮再期聊秉

芳兮自許

吟飛仙

沈東老隱于東林宋熙寧中呂洞賓過之與飲十八仙白酒因擘榴皮題壁迨

曉而別預示東老以化期後人取朗吟飛過之句建樓山間

秋空兮澄澄雲月兮千里嫋嫋兮天風濯滄海兮如洗
夫人兮與天爲期御清氣兮翺帝紫秋空兮無雲蒼梧
兮夕曛往來兮獨知曠城南兮無人矯蒼龍兮瞥青鸞
搖明月兮振珮環電光走兮青蛇翻踏長魚兮吳波寒
雲章兮霞縷氣橫掀兮目豪睨橫玉兮叫雲挾龍君兮
弄烟水擘榴皮兮東林染橘香兮洞庭君不可兮少延
攬曙光兮東明漁村兮起烟江露滴兮魚龍醒招獨鶴
兮泯無跡杳空山兮雲冥冥